

Pri laža prigoliejē sargības

Mona abodo tievā ējē i Alsiediu dvara i laža, bet i sargības. Mona tieva gimtēnē – Žvērbliātu suoduo, ož vēina varsta nu Alsiediu, vo muotīnas gimtēnē – Brazdeikiu suoda Lieplaukēs parakvējuo. Dvarē bova dēdēlē daug puonībēs. Viskops bovēs žmuonims gers, bet prastē bovē vēsuokēi dvara uriedā. Ka vīskops liūb sožēnuos anūm šonībēs, liūb rumbaūs dvarēškius už lažēninku spaudēma.

Rodēni vēsuokēs gerībēs vežē ēš vīskopa dvīlēkas dvarū i Alsiedius. Dvarū tēik beatmēno: Pasritēnēs(?), Rumšātiu, Vaštakēs, Alsiediu. Rodēni ēr kelius liūb ēšplaks bevežot grūdus, kiaulēs, avis, žōsis, kalakotus, pīlēs, gaidius ēr bevaront karviu ēr jautiu bondas. Ēš kēkvēina dvara liūb pristātis pu 12 pasku svēista, vo kēik tēn kēitū sūriu, apīniū, medaus – kas tēn beapsakīs. Vēskou ēš dvīlēkas dvarū trīlēktamē (Alsiediu) liūb priims. Kēik tēn liūb privažiotē puonībēs: puonā ont puonu, slūgas unt slūguos. Tujau pradies vērstē vērstē puonu tarnā, korēi bova sargībuo. Kap bētis pradies spēistē vēsū puonu nomū tarnā so stuotkās kad parneštu puonams kavuos-smetankas. Pana liūb ēšdoutē kava-smetanka – tēik, kēik liūb priklausitē kuožnam nomou. Kaverka priveiziejē pana.

Vo grūdus mala ont rēndas. Rēnduorē toriejē atsiūstē i talka miešlū vežtē kelēs pormakas so kuopiejēs, kapstītuojiejs ēr vedeklēs. Leibē jau ēš onksta liūb ožsīkvēistē sava sosiedus talkā, ka Šapskis parēkalauš. Vēinam sosiedou be mierkas somala, kētam kelis robliūs pažičiuojē. Talkā pats Leibē toriejē doutē valgītē. Posrītē ēšvērē avēžēniu mēltu kēsielio, padiejē sausā vērtūm vakarīkštīu bolviu, dounas pelainēs kap salamaka, ēr vēsos posrītēs valgīs. Nu posrītēs kēsielīaus daug lēka. Kažkas unt jouka pasakē: „Ontdiek rogēniu mēltu, ēšvērsi pēitams kuošēs”. Tēp ēr padarē. Pri kuošēs – dvē sēlkēs, sēlksoltēs, parūgainē pēina, pelainēs dounas. Talkininkā pīkst, strēmēj žīda, ka tēp prastā doud valgītē. Vakarov nu pēitu i lēkosējē kuošē ontdiejē mēltu ēr ēšvērē konkuolinē. Paskou žīds pasakuojēs:

–Ui, ka tēp gerā daviau valgītē, vo vēs tēik jūsa šeimīna nevalgē, vo po Šapskio bovosejē valgē.

Baudževuos laikū dainas

Esu sau žmogelis laimos kuožam darbē,
Vēs man kluojēs pagal Dieva nuora – būk tau garbie.
Užmokiejau duonē, kur uždiejē puonas,
Gēr moni užtat uriedas ēr konēgs klebuonas.
Atbovau laža, nuors so dēdē bieda,
Nebēbējau dabar puona ē sava urieda.



Mickevičė Juozos (1900–1984). Portėgrapėjė iš Lietuvos Nacionalinės Martėna Mažvėda bėbliuotėkas Rokraštėu skėriaus, F. 165-111. Puotuograps nežėnuoms

Žydou neskuoligs, nuorint kas nedielē
Pėrkis alaus diel prietelkas, gėrdau prietelkelē.
Tonkē, kor dēdēlē tortā, tēkruos laimēs nier,
Kad puons ēr tortings ĩr.
Nemainičiau savo vargus i jo dēdēs naudas,
Vo aš vēsad liksmos, ar aro, ar siejo.
Prašau, Dievė, būk ēr tuoliaus mona geradiejo.

Jau aušta aušrelē, praded vēštas karktē,
Reiks mums, vargdienielems, pri darbelē ētē.

Atsėkels puonas, kaip kuoksai markintuonas,
Šaukia unt urieda, sužadēn šeimīna.

Uriedas eidams, lėndrē siūboudams,
Kelkėt greičiau, balnuokėt žėrgelius.

Oi matošē, kam to moni paugēnā,
Bova mestē i opelē ēr i gėlē sėitovėlē.

Pėktē puonā ēr uriedā,
Neduod mon čion paėlsietē,
Lėskis, saulē, tekiek, mienou,
Douk mums liksma vakarieli.
Užgriauž puonams ēr uriedams,
Kad saulelē unsėlēda..

*Padainiava Bubelātē-Zubavičienē Marėjona 1927 m. rogpjūtē
20 d. Beržuorē, Plateliū valsčiuo. Užrašē Mickevičė Juozos*